

愚

齋

存

稟

愚齋存彙卷第四十六目錄

電報二十三

江督劉峴帥來電

東撫袁慰帥來電

寄北京慶邸李相

又

寄北京慶邸李相甯鄂督帥濟南撫帥

李中堂來電

寄李中堂

袁慰帥來電

寄甯劉帥鄂張帥濟袁帥

寄慶邸李相

袁慰帥來電

寄慶邸李相

寄李中堂

寄北京慶邸李相江鄂劉張兩帥

寄慶邸李相

袁中丞來電

劉峴帥來電

袁慰帥來電

劉峴帥來電

浙撫惲菘帥來電

寄慶邸李相

寄西安王中堂江甯劉峴帥蘇州聶仲帥杭州惲菘帥

張香帥來電

又

袁慰帥來電

劉峴帥來電

又

張香帥來電

寄甯劉帥鄂張帥濟袁帥

李中堂來電

西安岑中丞來電

俄京楊使寄香帥電

法京裕大臣寄南洋電

劉峴帥來電

張香帥來電

袁慰帥來電

寄江督劉峴帥鄂督張香帥晉撫錫清帥東撫袁慰帥

劉峴帥來電

張香帥來電

又

又

劉峴帥來電

寄杭州惲中丞

又

寄江鄂東督撫帥

惲菘帥來電

日本李星使寄榮中堂王中堂劉制台張制台電

寄李中堂

袁中丞來電

又

劉峴帥來電

又

寄江鄂東督撫帥

劉峴帥來電

袁慰帥來電

又

又

又

寄慶親王李中堂

袁中丞來電

張香帥來電

愚齋存稟卷第四十六

電報二十三

江督劉峴帥來電

光緒二十六年十月初一日兼致香帥慰帥

邱相致榮電可冀出力現亦再致榮一電盡此忠

告電稟呈鑒文曰凡自北京及行在來者莫不

謂董跋扈不受節制擁兵輦轂跡近挾持深恐釀

禍以貽宗社之憂於公亦有不利現在由鄂

解陝銀米以及軍械軍火洋人疑爲接濟董營屢

欲攔截香帥百端解說總未釋然此次王世雄所

帶岑中丞洋槍太多尙須設法轉運北京迄未開

議始終以董爲嫌似此中外切齒何故曲予優容
儘可別調一差令其去陝以釋羣疑眾怒或尙可
以瓦全彼若稍有人心未必遽生反側否則所部
必不從逆取之何難董爲公所提拔之人務祈及
早圖之以謝天下之責芻言有無可採伏候卓裁
仍賜電復云

東撫袁慰帥來電

十月初二日兼致峴帥香帥

甯冬電悉榮電已發文如下國勢危急中堂竭力
維持 宗社幸甚惟聞各國仍嫌辦輕尤恨毓
董將具哀的美敦書如仍堅拒和議從此決裂再

戰必亡路人皆知 宗社生靈何堪設想各國

又有另立政府之說使中國自相殘殺無一寸淨
土計甚兇狠現今要計惟在保存 宗社安全

兩宮當師句踐屈以求伸何可以 宗社

兩宮之重下殉諸謬且 宗社岌危

陵寢驚擾 兩宮播遷百官流離士夫破亡生

民塗炭誰肇其端卽令諸謬自擬罪名亦難末滅
毓倡興拳匪濫殺多命董首戕日員激成巨衅皆
爲中外切齒人以董蒙識拔多疑中堂庇縱時爲
剖白仍疑信參半如入直後董仍掌兵致危

宗社天下後世詎能相諒請設法補救力扶危局
列聖在天當亦感慰薄海士庶更不待言迨

切直陳敢乞鑒納

寄北京慶邸李相

十月初二日

峴帥東電云呂使宥電懲罪有關 國體屢經力爭頃
得盛電剛故毓遣王大臣分別圈禁革調當卽譯交外
部告以親王至革爵職爲最重又復圈禁核與西律弑
逆只監禁者已屬加等各大臣分別懲辦在 中朝已
斟酌至當實屬格外從重歐洲每以華刑爲酷今反逼
令加重殊不近情況各王公大臣志在保國不得謂之

不忠斷無不分輕重概與駢誅之理董執兵柄操之太
急勢必變生肘腋仍應請 中朝相機自辦不可再爲
催逼彼聞之似亦憬悟允與各國再商又告以瓦帥在
華武威已震勿再派兵前進致小民蹂躪况踞保定

西陵戕害大員舉國尤爲憤激亦應早退以安眾心
請飭撤隊議結彼云德廷亦願早結惟瓦帥係八國統
領本部不能遙制又告以德君屢言仍願與中國交好
若奏請速頒訓條飭其停戰速議當無不從反復辯論
彼允與各國會商並云今日瓦帥與王爺會晤和議不
日可成聯軍自然撤退容日再復等語王爺是否與瓦

帥已見尙受商否各使議款西報已登聞美廷大半不以爲然已飭康使居閒調停確否謹先密聞傅相諫電已悉曷勝焦憤餘得復再電以上均請秘密乞轉慶邸並李張云宣轉

又十月初二日

峴帥東電云兩電奏悉佩甚做處亦有一電奏與尊指同未知能助力否事勢危急祇合盡所當言親王永遠圈禁法無可加亦符西洋皇族罪不加刑之例前接楊星使電援拿破崙王窮兇極惡只幽荷島弒奧后意王之犯僅禁黑獄終身何獨苛求中國自可執此力爭惟

李秉衡應撤卹典剛毅趙舒翹兩人均應革職毓賢應行正法董福祥應先罷其兵權調往別處不准逗留陝西似此定擬電陳尙蒙俯允或可稍紓各國之憤不致變其宗旨另生枝節卽請王爺中堂會奏應否江鄂聯銜附驥伏候卓裁仍求電復宣轉

寄北京慶邸李相甯鄂督帥濟南撫帥

十月初二日

頃奉軍機處交到三十日電 旨一道奉 旨奕劻李鴻章勘電悉事機緊迫所不待言惟來電詞意尙欠詳明現既會商列款開議其所索各條是何端倪曾否見過有無萬不能行之事該親王等責重全權自應據實

密奏一而相機審勢補救得一分是一分總之大局攸關款議可成不可敗兩害取輕是在該親王等惟力是視朝廷不能遙制也欽此除轉京外乞秘宣懷謹轉

李中堂來電

十月初二日兼致峴帥香帥

二十函抄各電苦心忠言乃榮一到竟明發定案頗自居功圓媚可鄙邸因議處覆上自請圈禁發遣各國鼓譟又欲加重須彼照會到核奏吳應科未見豈聯軍阻撓京員請明春運米平糶乞預籌

寄李中堂

十月初三日

香帥講電云赫德節略此次賠款四五十年內每年須

籌出三千萬等語照此核計似其須賠款十五萬萬兩矣又聞人言赫德擬賠款四千萬鎊合銀不過三萬萬餘兩二說參差未解然則赫德所言每年三千萬兩想是連以前洋款在內是否如此祈速示等語宣按赫德算利在內似相近

袁慰帥來電

十月初三日兼致峴帥香帥

續致榮相電云從來敵國相爭必有主名著於史冊具可考見此次諸謬縱庇拳匪構衅全球義無可稱名本不順殃民誤國罪實難辭如因優容罪人再啟爭端尤爲不順之甚者聞直屬官民大半

牛酒迎敵甚有請敵保護者人心已可概見固由
勢力難抗亦由諸謬敗壞大局尙未明正其罪不
足維繫人心耳諸謬爲國賊爲民蠹卽無各國要
挾亦應嚴辦以伸國法剛毅雖死亦應暴其罪狀
追奪職銜庶賞罰猶存紀綱猶立尙可以服敵國
而慰天下昔晉爲盟主猶殺涉佗以謝衛人漢當
全盛猶誅鼂錯以謝七國韓侂冑構衅金人宋斬
之以首昇金自古輕挑衅端至僨國事者無不置
諸重典當其時聖君賢相亦必有許多爲難然皆
不愛一人以謝天下尤不愛一人以救萬民古人

有言曰蝮蛇螫手則斷手螫足則斷足非不愛手
與足也以不斷則禍連腹心利害相懸故不敢姑
息況諸謬徒逞私忿輕敵列邦以

宗社 五

尊爲孤注自古無此謬人棄之復何足惜至諸國
聯合圖我固難測度惟有盡其在我杜人口實安
我人心始可相機結束前電未盡故復續陳特聞

寄甯劉帥鄂張帥濟袁帥

十月初四日

榮相復慶李江電云艷電本日進呈已另有 旨不爲
遙制各國請將董逐退自應酌辦現所統三十營已減
三分之一而驕將悍卒密邇 行在遽撤兵柄彼誠無

異志其部下或虞激變擬請予革留處分先令帶隊回甘以明逐退之意徐作良圖且甘民亦感董建有生祠悍軍愚民均可慮當此危迫萬分弟何至袒一將而妨大局苦衷當可共諒祈速電復以便力請照辦再朝廷既許便宜行事萬急之際自應實做全權二字以就款局切要等語乞秘之

寄慶邸李相

十月初四日

香帥江電云李使三電述各國擬索條款派員監理中國財政一案最有害恐藉此漸奪我自主之權是否如稅務司章程抑別有辦法似必須商改總令賠款有着

爲妥又禁軍火入口一條據李函云美擬改爲或定限期或議定經理章程不知如何經理德日均可售械英可售船似可諷德英日三國阻之如必不允或有一法彼並未禁我自造或議明可募外國人在華地內設廠製造專售與中國則亦無妨又撤直隸沿海砲台一條查此次係各國聯合利害共之故設此條假如以後或與一國失和京畿全無防守於中國固損於他國亦未見有益似可以此與之辯論又謂顧問官一條係設在何衙門如彼堅不肯改似議明聘用美國人較妥又條款與哀的美敦書同來最爲強狠事關永遠利害期促

難於籌商望先與婉商並託美國勸阻萬勿發此照會再賠款總數務祈賜示以上各節恐開議後期限急迫豫陳管見是否可采祈鈞酌示復等語謹轉

袁慰帥來電

十月初四日並致峴帥香帥

甯豪鄂江支紙滙江支各電均拜悉江旨懲禍意僅一毓恐仍難就款應請邸相將諸謬指實足了事辦法分別擬奏並聲明辦法止此無可磋磨庶免觀望拖延如仍吞吐願忌內視太易必至誤事否兄能否密告傅相鄂預籌議約各條甚善監理財政則用人行政已大半在其主矣法兵往晉

又糟一省然又非口舌所能爭也

寄慶邸李相

十月初四日江督鄂督會電

勘奏轉後請劉張電奏助力茲摘要奉達法副提督德
提督總領事先後來甯首問坤 回鑿期繼以首禍未
嚴辦毓董罪尤重必須駢誅並疑解陝銀米軍械接濟
董軍微露阻截意漢口英領事問之洞 回鑿期告以
聯軍未撤斷不能請詰以必請 回鑿何意彼云 回
鑿則可離開董軍免其挾制 朝廷答曰若只爲離開
董軍若將董軍調至他處能即開議否英領語意蓋欲
先以遠離 聖駕以便懲辦察看情形圈禁四人雖未

滿意尙可磋磨其餘降調革留非再加重不可毓董最爲各國切齒堅請必置重典語尤決絕聞慶李正在商辦各國已預備哀的美敦書如所請再不允和議必不成禍速且烈且八國戰艦屬集吳淞若進攻沿江實難抵禦目前水盡山窮萬無可戰和局勢難游移愈久愈難收拾 大清數百年 宗社亦萬無因此數人坐致危亡之理伏願 宸衷獨斷立賜施行縱或董暫難嚴懲亦應設法奪其兵權遣離輦轂以釋各國之疑云 支河上達劉袁另電榮皆盡忠告

加重既須候照會再奏江 旨先辦毓罪榮電先調開
董軍似可速辦不必候彼照會惟調董似可分其十營
赴晉孫鍾祥東電密探俄德等軍有往草地西行之信
又法統領向高護藩言端莊等未交與各國恐不能開
議至德法西往之兵意向不止此昨德兵往曲陽佔據
煤礦獲鹿電局已被法佔云吳應科已赴京明春平耀
可辦

寄北京慶邸李相江鄂劉張兩帥 十月初五日

頃奉軍機處支電本日有致慶親王大學士李鴻章電
信一件希貴京卿迅即轉電爲要爲此知會本日接到

劉張冬電已代奏希京卿將初三日 諭旨慶李電

旨一道照錄原碼密速分電江督鄂督知照支電慶親
王大學士李鴻章艷電已悉劉張兩督前經奉 旨會
商款議畀以便宜行事現在東南大局正賴掖持款議
尤賴兩督妥爲參酌 朝廷倚畀方殷豈有撤任之理
各使傳聞定有漢奸從中捏造謠言播弄是非貴親王
等務向各使剴切相告切勿輕聽浮言爲其搖惑是爲
至要榮祿等支宣謹轉

寄慶邸李相 十月初五日

峴帥微電云閩法兵將赴晉毓賢殘害教士多名誠難

怪外人切齒第罪在毓而不在晉毓早褫職晉民何辜
洋兵深入徒使地方受害況 朝廷已允辦毓法人當
可釋然伏祈鈞座設法勸阻以保全晉而維大局現請
罷董若法兵西徧日深 兩宮倚董爲衛不肯遽罷
萬一要挾 車駕再幸他處益成不了矣祈賜電復宣
轉

袁中丞來電

十月初五日兼致峴帥香帥

先驅董回甘再作良圖已有辦法耶相能實做全
權更有辦法特恐耶怯耳宮保挾幸一慮極是朝
鮮曾與倭約用顧問官旋即辭退如用舍之權自

我操之似尙無大害陝來信秦伯梗和議阻 回
鑾自榮相到甚斂跡榮未到前 天心未轉云以
近日陝電參度會奏必當 上意

劉峴帥來電

十月初五日兼致香帥慰帥

香帥預籌議約各條甚佩鄙見顧問官卽干預自
主之漸仍不能用請再酌法擬派兵赴晉機局甚
危江 旨已允辦毓似可以此謝之頃已電邸相
勸阻矣第辦毓或能保晉若議款恐非此卽足謝
責甯鄂會奏計已上達不知有當 聖意否

袁慰帥來電

十月初六日並致峴帥香帥

頃接榮相歌電云時局本萬難措手非不力辦千里勇丁已減三分之一更擬請以帶隊回甘以符慶李來電逐退之意總之萬不能袒一將而妨大局苦衷當爲剖白其諒等語董既可逐餘更易爲劉峴帥來電

十月初六日

董先革留調回甘肅實是良策請杏翁速電邸相切實電奏速辦以免夜長夢多中國於此事實有爲難如此辦理正是欲擒先縱與各使開誠布公度可相諒洋兵分趨西北能以辦毓商阻否昨又致錫中丞電請速嚴拿拳師以杜外人藉口祈香

帥亦致一電較可得勁西摩見無事談及浙事否
浙撫惲菘帥來電 十月初六日

奉初四電 旨擢授浙撫並催迅速接篆想因教
案之故 聖恩高厚自愧疏庸值此時艱詎勝重
任惟仗江鄂兩帥維持尤懇我公隨時指教或可
轉危爲安求退反進出於意外霍領事在漢口時
翼任關道相處頗好洋人於隔手公事較易了結
晤時乞代致舊日交情並告以浙江列入東南和
約司署首先發電此係明證初九接印後再與通
函電也

寄慶邸李相 十月初六日

香帥月電云聞法兵將赴晉自係爲教士雪仇查晉民
素性謹儒前次殘害教士皆毓賢一人主使今 朝廷
必將毓嚴辦至新撫錫中丞保護教士懲辦匪徒不遺
餘力並無開罪之處諒法兵亦不忍遷怒若必深入徒
使良民受禍似非聯軍用兵本意務祈鈞座婉詞勸阻
容我確查當日隨同妄殺之人懲辦以保全晉生靈無
任叩禱並求賜復等語宣轉

寄西安王中堂江甯劉峴帥蘇州聶仲帥杭州惲恭帥
十月初六日

傳相支電江浙冬漕現存滬棧有無起運 行在所餘
若干戶部欲設法明春運京濟用希與蘇浙籌復云查
京通倉米及津棧存米均爲聯軍搬運自行平糶無存
滬棧尙存蘇漕二十五萬一千四十九石浙漕口十四
萬五千五百六十二石究擬起運 行在若干蘇浙諒
經商定其餘若干開春似應運京合用因所存均係糙
米由襄陸運需費兩倍米價長安不需甲米俸米亦屬
無多本屆冬漕除白糧外似宜多辦折色即使要米不
妨派商試辦採運將來度支愈竭此亦節省之一端是
否有當乞速賜酌定

張香帥來電

十月初六日兼致峴帥慰帥

江濟致榮三電均佩直諒濟續電尤宏偉實爲諸
罪人定案假如用爲電奏更足警悟盈廷昭示天
下矣董調開後將來必有各省聯銜請重懲一疏
望兩帥先擬彙備用須瀝數其焚殺都城劫掠畿
輔士民切齒其數營過境滿載劫賊州縣備大車
百餘輛是爲害民其軍駐京本爲護駕城陷後
擁兵西行並不在城外候扈到大同始接駕致
兩宮多受危險是爲負恩此二罪不關外國仇恨
也謂甘民感董從亂洋人恐斷不信呂使電告外

部言稱諸罪魁爲保國忠臣於懲辦亦小有妨礙

又

十月初六日兼致劉峴帥袁慰帥劉景帥惲菴

西摩晤兩次與滬領霍漢領法同見寒暄及空論
不述外西云擬派小輪入襄河口探水道許否張
云漢口領事秋閒說過謂總署章程許小輪行內
河當告以此時襄河水淺沙多小輪入口止能行
六十里斷不能到襄陽探亦無益且今日時勢不
同尙未開議必致訛言繁興長江驚擾若欲探水
須俟明年四月漢水漸漲彼時和局已定自無妨
礙西云可明年屆時當再商語氣和平尙不爲難

西云近日運陝之銀米兵械甚多係何省所運張
云東南各省皆有西云餉械既多得非接濟董軍
乎張云 聖駕所在扈從官員兵丁甚多陝省又
荒義應接濟豈爲董軍且董屢經江鄂奏劾濟之
何爲西云西安各物足用 朝廷或無意講和乎
張云我知 朝廷真心願和且願速了內外大臣
亦願早定和局與英國及各國同西云董能調開
乎張云江鄂已會奏請調開嚴辦但其部下兵多
須分兩層安辦 朝廷當可允調開西首肯西又
云董能爲變亂乎張云董性凶悍回兵亦橫將來

若重懲難保無他但離開 聖駕則無礙矣西云
何時可 回鑾張云未見 明旨不能妄揣但前
已有 旨和議定洋兵撤卽回京惟必須京城整
理畿輔安靖方能定期行程亦須數月若待 回
鑾始開議太遲彼此不便西云洋兵在津沽少至
若干卽可 回鑾張云愈少愈好漢領法彞斯云
昨日已奉本國政府電諭只須調開董卽可開議
不必俟 回鑾西云有久都西安之意否張云未
聞但各國必欲請 聖駕回北京何意西云各國
公使駐北京久風土相習按此乃飾詞實爲近海

又通鐵路張云此情我所深知但今日建都之地
必須 朝廷穩便中外便利兼而有之方爲合宜
按此乃隱隱針對撤直海砲台津沽駐兵而言前
已屢與英領言鐵路修通各使到陝亦便何必回
京蓋恐 朝廷終不 回鑾故預留此地步以見
我非欺謊也西云蘆漢鐵路已修若干何年可畢
張云明年秋可修至信陽此段工最難既須築隄
又須開山路雖止四百餘里核計黃河南岸工程
實已得半後年冬可畢西云黃河通橋乎張云原
議通橋但經費太鉅張又問之云貴提督意以西

安建都爲何如西云此事未奉政府諭此乃私議耳西又云湖北近省有兵幾何張云七千張又云貴提督顧全東南大局中外商民同受其益感謝西云此乃貴部堂保護之力感激之至滬領云亂黨在滬者我已令其速離開張稱謝浙事力言已不派兵往另電詳

袁慰帥來電

十月初七日兼致峴帥香帥

甯滬魚鄂月麻語各電均拜悉兩帥保晉保浙保長江保全局慘淡經營仁言利溥佩甚洋兵犯晉似不止專爲毓賢應請邸相先詢商或由三公訊

明駐滬各洋員如何辦法始可止兵誅毓可止卽
奏請迅辦否則毓誅而兵仍不止嗣後再有條陳
必多疑阻錫帥旣欲補救杏兄可囑其將毓殘忍
各節詳晰奏劾如肯並劾董恐仍難辦到極處耶
相擬另立專條雖損國體然較切實至諸人擬
罪必須耶相據實奏陳我輩始可分頭推助現宜
稍待

劉峴帥來電

十月初七日兼致香帥慰帥

陽電達否頃擬劾毓電奏請酌改卽由鄂擊銜速
發文曰行在軍機處鈞鑒近接探報洋兵分趨

宣化獲鹿又錫良電洋兵四偏晉防萬急良承毓
後萬死不辭惟 乘輿再驚生靈塗炭如大局何
祈鼎力補救仍阻西趨等語查洋兵赴晉實由毓
賢殘殺教士各國恨之切齒毓賢身任封疆宜如
何仰體時艱共維大局乃竟任性殺戮開衅友邦
乖謬暴戾實所罕見各國傳教載在約章各處教
民莫非 朝廷赤子因何獲罪竟予駢誅中國法
度殺人者死況妄殺遣人慘殺多命迭奉 諭旨
飭令保教毓賢竟敢抗違卽無外人要索亦應立
正典刑以伸國法今敵兵大至晉省已危全晉生

靈何辜受此荼毒爲今之計惟有仰懇 宸斷立
將毓賢正法電飭全權大臣照會各國公使商令
退兵一面嚴飭錫良捕治拳匪頭目不得再涉疏
縱以杜聯軍藉口剿匪或可保全三晉秦晉唇齒
安危與共坤一等不勝急迫之至除分電各出使
大臣迅向外部勸阻並告令若肯退兵當奏請先
辦毓賢以洩鄰憤外請代奏

十月初七日並致香帥慰帥

洋兵不入浙深賴香帥總持問答語均扼要得體
漢英領謂奉彼國諭只須調開董卽可開議不必

俟 回鑿各語望杏翁速電示

張香帥來電

十月初七日並致峴帥慰帥

西摩詞和而意很反覆數百言大指不過曰若再
不和必斷長江接濟矣暫不入江者非有愛於長
江也礙於德俄法也德領俄領閩西摩來均來問
意頗不悅德領言德無入江之意賴此得稍緩耳
過甯問答速示前奏尾有續陳語自須會電奏但
措詞須簡括商安

寄甯劉帥鄂張帥濟袁帥

十月初七日

德兵赴張家口法兵赴獲鹿係單軍不致遽犯太原惟

逐董辦毓不可錯過機會京奏專言逐董甚得法後文
宜稍緩毓則滬會摺參適值毓過河時京電慮專辦毓
無把握甯藥請先辦洩憤必有益惟毓殺教士請查在
何時若在開衅之後奉 旨保教以前字句請酌

李中堂來電

十月初七日

劉張支電奏卽復榮眷電均剴切董已據各國照
會入告各使候其政府電復卽列款照知懿親加
刑尙有辯論餘須摘出請 旨毓必在內香籌約
款容酌采德法西行俟俄開議再定希轉復峴香
裕長何日病故卽電示

西安岑中丞來電

十月初七日

陝灾前經電懇各善長廣募賑濟未蒙全復查陝
被灾五十餘處草根樹皮搜挖已盡天寒死亡益
眾省城開有粥廠每日且斃數十人外屬可想春
煊不善撫字罪無可辭惟赤子何辜罹茲慘酷伏
念我公飢溺關懷爲善士仁人之領袖務懇廣約
同志迅集鉅款活此灾黎並懇多運米糧年前趕
到運道請酌如蒙惠允陝省幸甚大局幸甚

俄京楊使寄香帥電

十月初七日

號悉當卽切電外部請俄力勸各國止兵安民以

速和議外部旬日可歸未知肯先復否保定之師
俄卽不與逞兵四出俄亦不謂然但彼曾至中國
果早謀了結必無此枝節若仍復因循恐亂方殷
和局成否在己不在人俄實愛莫能助等語各國
雖不欲久延和局然懲前毖後侵我主權皆在意
中若不早決慮變宗旨戶部前曾密談恐各國有
來春截秦運道或改立政府之意勢成騎虎胡不
可爲曠日愈久出計愈奇勿以彼不貪地之言爲
可恃現在難允之款恐終於一允各政府均授權
各使暨統帥未肯遙制轉圜之計在內而不在外

儒兩次電疏已痛陳延議之害同此焦急持危扶顛公有何旋轉良策

法京裕大臣寄南洋電

十月初七日

講電遵致尙無回話危迫已極有求皆應庶稍可望前彼開十一未誅一人各國同深怨懟不獨法然其進兵似不專爲毓今僅殺一毓相去尙遠已嫌其遲再曠日持久庚實未知死所我們虛實彼已看透求留意呂已照轉

劉峴帥來電

十月初八日兼致香帥峴帥

慰帥慮誅毓仍不止兵自宜由邸相詢商各使再

定辦法較妥鄙見戮毓或可免攻晉若謂可以定和局撤聯軍還京城萬無是理滬各領於北事恐無權過問承由杏兄將錫非毓比勦匪保教甚出力商法領轉公使何如劾毓奏應否電發請香帥酌裁

張香帥來電

十月初九日兼致峴帥慰帥

請誅毓奏似宜緩蓋一毓斷不能抹羣罪若毓誅而敵不贖以後我等難進言誠如慰帥所慮若局外人條陳內肯先辦亦好敵憤稍洩再將餘人商減或可措詞不然彼必執定十一人全辦不容開

口也邱相總不擬奏專候袁的美敦同來自走窘步不解其故擬會電促邱相速擬奏務趁美敦未來之先尊意以爲何如祈復

袁慰帥來電

十月初九日兼致峴帥香帥

鄂爲晉謀可謂至盡錫如能照辦並劾誅毓誠有數分可望但恐錫辦不到耳時局萬緊邱相從容以待或因火候未到耳誠不可解惟近日頗有轉機正可步步加勁遲則機鬆又多費事電促邱相甚要

寄江督劉峴帥鄂督張香帥晉撫錫清帥東撫袁慰帥

十月初九日

傅相齊電德法兵分往獲鹿張家口皆係德瓦帥調度似作勢赴晉尙無實信詢各使皆諉不知彼族用兵秘密無可勸阻然揣其理勢隆冬入山遠役固自不易希轉峴香及錫帥云

劉峴帥來電

十月初九日兼致香帥慰帥

西摩與霍總領事六人昨下午來署方往答拜相見兩次一派寒暄別無要語詢以法兵赴晉何故西云並無此事有則必先知會各國我等斷無不聞喻以中朝擬重辦毓賢並將董福祥調往甘

肅若法兵赴晉恐董要挾 兩宮上隴進川事

更難了西以爲然惟慮董不肯行告以董決不敢
抗 旨西云聞沿江添砲添台洋商不免疑懼答
以各處並未添砲添台唯天氣漸冷砲台弁勇不
能不蓋房栖止不可誤會日前法德兩提督相繼
來甯所坐兵輪又大是以軍民驚慌爭請堵塞長
江各處港路當經嚴行申飭不准妄言南洋決不
無端用兵開衅所慮法德來擾長江英不能阻則
沿江各軍不能不協力抵禦以盡職守萬無聽其
長驅直入之理西頗動色云德提督於入江前夕

見我自言來甯拜望並無他意此外則責西於七
八月調兵來護租界以致各國亦調兵來英不能
禁西謂祇有德法日各調兵數百名均甚安靜等
語西不認法兵赴晉似有匿情應請香帥照在鄂
問答緊切會銜電奏爲荷

張香帥來電

十月初九日兼致峴帥慰帥

擬會峴帥銜電奏其文曰英提督西摩到鄂力言
各省運赴陝銀米兵械甚多必是接濟董軍 朝
廷不願和之洞答以 聖駕所在義當接濟江鄂
已屢奏劾董濟之何爲西摩言擬派小輪入襄河

探水漢口領事言總署前已奏准洋人小輪可行
內河之洞答以時勢不同若和局定乃可又催將
董福祥調開嚴辦過甯亦與坤一晤江鄂兩處辯
論甚繁彼之大指不外乎再不和卽斷江漢接濟
一語意甚堅狠法副提督到鄂前德提督到江甯
亦同此意總之洋艦屬集吳淞三水提同時入江
其意可知目前雖經坤一之洞極力攔阻若和議
再延必出於此初七日上海各領事告洋行不准
將製造軍火之物件出售查造藥需用鋸水槍砲
之機斡零件鑽刀以及彈殼皆需上等洋鋼以後

江鄂兩局製造亦將束手謹將英提舉動大局緊急情形電陳請代奏等語請峴帥慰帥酌改速示復

又十月初九日兼致峴帥慰帥

幼董正續稟讀悉佩甚篇尾似須略擬辦法鄙意宜請降明旨即將董部分爲數軍卽令其營官幫統之類擇較純實者分領之明諭以罪止董一人與全軍無涉該軍有官有餉必不至隨董爲亂或有他善策亦請籌示總之此時先催調董明文此奏宜緩一步乃備用耳

又 十月初十日兼致峴帥慰帥

擬致邸相公電文曰王爺中堂鈞鑒各國以懲辦
首禍列爲條款又與哀的美敦書同來此舉萬分
險毒昨江鄂會電伍使請美勸阻美敦書不知各
國聽否讀鈞座魚電有俟照會到卽電達之語竊
以爲萬萬不可前奉 旨令鈞座密擬諸人罪名
辦法前讀鈞電尙有禁戍商減之說近讀鈞電只
言各國欲將十一人全置重典自由和議愈延敵
情愈憤竊思若十一人全誅 朝廷斷不能允十
一人全不誅各國斷不能允管見可否請鈞座體

察外情遵 旨酌量擬奏看 朝廷如何辦法若
肯重辦數人彼意雖未滿憤可稍紓必辦數人後
立即通發國書婉遜商懇或允酌減數人若此時
一人不辦彼必仍執十一人全辦之說商無從商
減無從減待彼照會既來限期緊迫條款煩要欲
酌條款則不能減諸人一律之罪名欲商減罪則
無暇爭國家萬年之久計稍一遲迴立成決裂必
致款亦不能較罪亦不能減懲罪太遲則重辦彼
亦不感許款太率則以後如何立國實爲非計若
此時先擬先辦中間有數日從容尙可探各國之

意指勸 朝廷之曲從罪名或可減數人條款必
能商數件期限必能寬數日先後之間大有區別
三提入江皆晤其意卽爲斷江漢接濟全局萬緊
宗社將危管見是否仰祈鑒裁速賜籌辦至
禱坤一之洞同肅佳等語請峴帥酌定增改均可
如意同詞異不必再商逕電滬發如辦法不同亦
望速示並請慰帥杏翁酌示請杏翁候甯電卽發
至擬奏係全權事江鄂不便列銜如邸相奏而不
允江鄂必當照邸相意速奏請杏翁並將此意電
達傅相再鄂意擬將此稟一面電樞廷俾胸中先

有成竹耶相奏到或可贊上采納或用原文或改口氣請三公酌示

東撫袁慰帥來電

十月初十日兼致峴帥香帥

聞董 恩眷未衰關中情形亦難詳知如少擬辦法或未合時宜或未當 上意多擬辦法奏內又嫌瑣屑似不如在會奏之先一二日由甯濟各擬辦法二條不可雷同電榮相預擇迨奏到相機爲之較周到總之董不患無辦法只患在不肯辦耳非先將其罪狀說透不可再陝探董現止二十營旂不足萬人云

劉峴帥來電

十月初十日兼致香帥慰帥

奏稟義正詞嚴氣充力勁董一生罪案亦千古定
評欽佩無地請香帥酌定應約何省挈同甯濟銜
預電約定相機具奏此稟甚爲妥善卽少約幾省
亦無不可

寄杭州惲中丞

十月初十日

日本總領事來云惲撫台不願與外國人說話答云何
以見得彼云杭領事教士來函稱惲督辦洋務局不肯
見洋人答云洋務是關道專責且有撫台在藩台未便
干預惲做關道極時務浙入互保約內實是惲電託我

我從來不說假話諸君切勿誤會小田切云我曾見惲
卻未拒我特布聞

又

十月初十日

頃美總領古納來云已將盛大人之意與璧利南面商
璧意亦尙和平允俟霍回會議惟鮑道是要人何以聽
其逃走答云鮑本無死罪想因此間電商撫台擬再嚴
參聞知而走古云鮑誘文教士至署殺死實該抵償答
云有何証據古云教士已死係教民所言答云劉撫台
去任實爲衙案 朝廷可謂極認真惲撫台電託我與
公等商酌了結我意應由中國自辦古云可以照允如

辦理不平仍當另辦答云承各督撫託與諸公訂約保護幸無失信只有此案甚爲抱歉故南洋與浙撫亦必肯認真辦我意英美聽中國自辦如何辦法仍與兩國總領事商定案霍既專管交涉十二回滬請三君先商酌我即電達撫台如以爲然我不妨與諸君會商好在我是局外必無偏袒古云璧亦不肯佔霍面子准候霍會商再來相告似此次將獲犯口供及尊意如何辦法請速函示

寄江鄂東督撫帥

十月初十日

鄂佳擬京電先自辦罪本是各國原請嗣因彼請全誅

而不誅一人全權恐決裂出此下策始終不自擬者多則內不允少則外不允也逐董誅毓內外已合仍不敢請者恐一毓不了也長安猶有待者恐得步進步也實則外人只要洩忿斷不因我辦得爽快添出枝節徵之東南互保之局可知梗概若依愚見先辦必好然必欲全權擬請全權不敢保也近來敝處曾致政府電不請代奏亦多上達或請兩帥酌擬辦法徑電政府作爲商酌語氣一面電致全權何如

惲菘帥來電

十月初十日

鮑道已於初九日由瞿令往常州拿獲現派員乘

翰迎提罪首已得辦案較易公必大慰公之關切
浙實關切我也感何如之能商定中國自辦乃上
上策明日當熟思詳復所對小田切各語中肯之
至卯金左右與日本人最密藉此造謠報復如英
領事擠卯金故事公雖閒談實已褫羣小之魄矣
以後乞代留意

日本李星使寄榮中堂王中堂劉制台張制台電
十月十一日

頃外部密告法議六款外一爲克林德立碑遣王
貝勒赴德謝過一爲被毀教堂墳墓立碑一整理

財政一商改現行條約一改總署章程其十一款
經各使議定電達各政府俟核准卽與全權開議
此外各條大半刪去惟各政府意見難測如有參
差恐須分國定約中國受虧必大難免割地甚至
久延不結又懲首禍一款日廷倡議請各國放鬆
聽中國自辦勿過逼勒致令爲難等情美極贊成
俄稍附和此外多不謂然將來能否辦到尙不能
定等語屬電陳並請秘密勿宣

寄李中堂

十月十一日

江督撫真電云承復語電擊畫周詳感甚佩甚與藩司

糧道熟籌存滙漕米現擬運陝五萬外連耗尙約存二十萬明春運津爲便實因運陝舟車難顧陸路險艱運費極鉅數倍於津擬運五萬加白糧一萬籌費已極艱難如何措撥尙無把握勢難多運新漕白糧擬酌量運陝並備隨蹕人等漕糧十萬石其餘擬請多折色以補運陝費之不足尙秦中需振擬卽以折款解請就近採買雜糧至和議成後商販流通或解款或委員採運屆時聽候部示坤等電商意見相同已有電行在戶部可否代奏請旨抑須坤等自奏俟核復遵辦北京電尙不能逕達祈代電李相轉咨戶部鑒核至禱等語宣

轉

袁中丞來電

十月十一日兼致峴帥香帥

頃接孫寶琦初三復電懲辦禍首因傳相前有圈
禁譴譴之請故照辦各使仍須列入條款持之急
當有後命 兩宮盼和前降 諭慶李不爲遙
制董日前自潼來請解兵柄治罪謂宜顧大局不
必顧一人詞尙懇切云果爾董尙有天良然亦甚
狡惟孫電八日始到請杏兄申飭沿途各局毋壓
孫電

又十月十一日兼致峴帥香帥

電京橐識卓慮遠極佩至並電樞廷一節倘邸相
另有難處不能照辦或絕書適到不及照辦內將
詣病邸相或與全盤有礙如待邸相復能照辦再
切實電樞似較周到請再酌並請杏兄催邸相速
復並告以江鄂待復加功

劉峴帥來電

十月十一日兼致香帥慰帥

董果如孫言尙有天良或故作此語以固寵然榮
正可藉此解其兵柄不審有此魄力否杏翁所論
各節胸中雪亮面面俱到佩甚惟全權旣不敢保
則江鄂亦何能下斷語要素與否固權在外人也

鄙見諸臣誤國罪在不赦是中律不是西法 朝
廷當論其應辦與否不當問外人之能允與否既
應嚴辦何必待各國之要求損我大權傷我國體
是非自有定評中外理無二致似可揭明此義或
電奏或電政府未知香帥願列銜否幸速示若待
美敦來則無及矣鄂擬致邸相電仍請杏兄速發
電樞似可從緩

又十月十一日兼致香帥慰帥

會致邸相橐極妥善預跨一步正是解鬆一步關
係甚大請杏翁速發惟一面電樞一節一若邸相

專候美敦要君似不安請香帥再酌

寄江鄂東督撫帥 十月十一日

甯真電榮相簡明切要與邸相魚奏暗合千里自請治罪必已聞知中外相煎誠難免有意固籠恐榮相轉受其愚慰帥務必再電仲老兩帥能否電奏對症發藥將計就計只要此人辦妥大事定矣正在緊要關鍵萬勿放鬆

劉峴帥來電 十月十一日兼致香帥慰帥

劾董奏略擬辦法極是此係預擬董軍調開後續効之件似可指請將董正法擇純實之將分統明

降諭旨以安兵心請香帥酌添電約各省爲禱
此時以催調董最要頃致榮相電曰款局迄未開
議各國屢請嚴懲禍首嫉董尤甚聞已預備哀的
美敦書若待書到必是請全辦十一人不允則立
致決裂不若趁書未到先辦董酌予處分調回甘
肅由全權告知各國商酌先行開議彼憤稍釋或
易就範關係甚重機局甚危祈鈞裁電復云請慰
帥再加一電字句不妨加重

袁慰帥來電

十月十二日兼致峴帥香帥

彼欲全辦我不肯允終歸一裂彼此費事譬如虎

兇出柙愈逐愈遠縱能捕獲所損必多何若設罟
獲伏陷阱誘而擒之用力省保全多如肯先訂草
約載入肇亂諸臣必須查辦嚴懲追約定 駕回
諸謬亦各回巢執約查辦何求不得勢不能因諸
謬再翻和局雖稍遲時日而計可萬全請高明熟
思之

又十月十二日兼致峴帥香帥

孫電 朝意謂董帶兵聽令非肇亂且恐爲患故
從緩董自懼甚似不足爲患云如會劾一到當可
破聽令之見寒老賊之膽

又十月十二日兼致峴帥香帥

甯尤眞瀝卦眞各電均拜悉劾董尾必欲敘明辦法擬請加董所部搶掠飽載大半思歸應分別裁併酌留數營擇其部將內性情純實素得兵心者量加擢用飭令接統將董立正典刑並明降諭旨布其罪狀罪止渠魁以安兵心而謝天下等語請酌改甯瀝兩論極透澈惟人則勢眾謀堅我則照常磋磨外臣居中設策辦法幾窮卽如董已允逐而邸相魚奏迄無下文餘可概見

又十月十二日兼致峴帥香帥

續致榮相電曰命使議和已逾三月迄未開議者
爲諸謬耳如仍拖延決裂姑不必論卽兵費賠償
一日何止百萬縱能成和而賠款過鉅何以立國
況諸國合謀愈久愈多枝節敵日增利我日增害
萬不能因拖延稍獲便宜至諸謬受 恩深重目
擊艱危固應有以自處何苦使 朝廷爲難使
國家受累自古人臣身當大難事成則利歸於君
事敗則已代其害未有肇禍自己貽害於君而已
反圖倖免者也爲諸謬計不妨當作臨戰捐軀爲
國捍患從容就義以紓國難 朝廷亦可以盡節

殉難看待但能保全 宗社俟和局定後即可
優賜後裔多封支庶澤流無窮與國同遠豈不兩
美如但圖己身一時之苟免誤 聖朝萬年之基
業勢將同盡利害懸殊請設法開導爲久遠計幸
甚等語此電本鄂意計邸相不日當有電姑預言
以待加功

寄慶親王李中堂

十月十二日

頃軍機處交到十一電 旨一道奉 旨綽哈佈電奏
預籌到省後應辦事宜請撥鉅款或在滬息借等語著
奕劻李鴻章電飭盛宣懷俟該將軍抵滬或向中國通

商銀行或向匯豐銀行妥籌商辦先行息借銀三四十萬兩以應急需至該將軍到旅順昭俄提督因應機宜及到省後如何接收布置之處仍遵前旨詳細預籌電知綽哈佈爲要欽此查通商銀行京津兩處被欠百餘萬毫無收拾華商焦頭爛額斷難籌辦理合聲明

袁中丞來電

十月十二日

頃致榮相電曰聞十國公請遂董迄無復文勢將決裂等語前讀歌電擬令董回甘今或又有變局惟法德近逼三晉英法德窺伺長江大局危急時值隆冬和議久延奉直吉江四省官民被兵蹂躪

凍餓流離每日死亡者詎可數計聞之痛心如各國再擾長江糜爛何堪設想中堂斷不袒一將而妨大局 朝廷尤不至惜一人而損生靈卽董亦何妨挺一身爲數百萬官民請命請速圖之倘因明發措詞爲難或渾言其任性妄爲紀律廢弛先降 旨斥逐再設良策祈教云

張香帥來電

十月十二日兼致峴帥慰帥

峴帥意擬奏請於美敦未到以前懲辦以申中國之法以存自主之權極是洞願列銜唯美敦所言將禍首由我拘住聽候查辦此舉甚惡查辦者審

辦也如廷雍故事也前日李使齊電言日廷倡議請各國放鬆聽中國自辦勿過逼美贊俄和云云亦不是大轉機自辦者勒中國自誅也非輕重由我也恐政府不解此意則毓外必不辦一人矣此兩層必須照鄙說詳晰解釋奏明若不奏則達知樞廷轉陳 聖聽至要論此時辦法自宜於哀的美敦未到以前速誅數人最有益然以情勢度之全權未擬奏以前決不肯卽行誅毓卽全權奏到而美敦未到亦決不肯於毓外再誅一人然誅毓逐董餘人皆有罪名雖不重辦亦必有益此次會

奏似宜原照甯電所云諸臣誤國中律應辦非因
外人不宜待要求損大權云云發揮透切但只可
渾言請 朝廷裁酌嚴辦以救危險至毓賢已蒙
朝廷允辦然非辦毓一人所能了事千萬勿待
美敦蓋美敦未來或可少辦數人美敦既到則十
一人恐均難商減且必致累及他項條款全權所
以至今未擬奏者蓋因各國欲一律從嚴口氣未
鬆明知辦毓一人斷難了局結尾處或云如 聖
意於他人未肯遽行重辦卽請先將毓置重典餘
人除已圈禁外一律褫職或圈禁或監禁或遣戍

總之十一人皆有罪名外人意雖未滿憤可稍紓
請迅卽明降 諭旨後一面速通發國書婉詞切
懇各國勿來美敦書希冀眾怒稍解條款較輕限
期較寬然若無重辦之人或毓外餘人全無罪名
則國書亦無益等語但照此又似代全權擬奏矣
然結尾一段若不說則止誅一毓餘人無罪且爲
高官恐無大益矣應如何措詞或改爲公電樞廷
統請峴帥酌定改安速復並望滬濟酌復

愚齋存稟卷第四十六